

Iluarsiissut

Saqqummiussinnermut allakkiaq 16. august 2018-imik ullulerneqartumik taarsiivoq
(*Naalackersuisut aamma suliaasaqarfiit agguataarnerat pillugu kaajallaasitaq ulloq 11.*
Oktober 2018 tunngavigalugu iluarsiissuteqarpoq)

Uunga siunnersuut: Pinngitsuuisinnaajunnaarnermik katsorsaaneq pillugu Inatsisartut inatsisissaat nr. xx, xx.xxx 2018-imeersoq

(Peqqissutsimut Isumaginninnermut Inatsisinillu Atuutsitsinnermut Naalackersuisoq)

Saqqummiussinnermut allakkiaq

(Peqqissutsimut Isumaginninnermut Inatsisinillu Atuutsitsinnermut Naalackersuisoq)

Siullermeerneqarnera

Naalackersuisut sinnerlugit matumuuna pinngitsuuisinnaajunnaarnermik katsorsaaneq pillugu Inatsisartut inatsisissaattut siunnersuummik saqqummiussivunga.

Naalackersuisut UPA 2014-imi nalunaarusiaq: “Atornerluinnermut katsorsartinneq, pisariaqartitsineq inuiaqatigiinnullu iluanaarutissat” saqqummiuppaat, tassani qitiutinneqarput annertunerusumik atornerluiffiusut (imigassaq, hashi aamma aningaasanoorajunneq). Kingusinnerusukkut nalunaarusiaq atornerluinerup aningaasartuutaaneramik misissueqqissaarnermik ilaneqarpoq.

Nalunaarusiat eqikkarneqarnerisa takutippaat nunami maani aanngajaarniutini atornerluinerup annikillisinneqarnissaanut anguniagaqarluarluni iliuseqarneq inuiaqatigiinnut annertuumik iluaqutissartaqassasoq. Imaaginnanngilaq inuiaqatigiinnut annertuumik iluaqutissat, kisianni aammattaq inunnut ataasiakkaanut iluaqutissaasoqarpoq, tassa ukiut inuuffiusut amerlisinnaapput, peqqissutsimi inissisimaneq pitsanngorsinnaavoq aamma inuunermi atukkat pitsanngorsinnaapput aammattaq inuuniarnermi atugarisat pitsaanngitsut ingerlateqqinneqartarneri kipitinneqarsinnaallutik.

Nalunaarusiani inerniliineq tassaavoq innuttaasut inersimasut affangajai atornerluisuusut imaluunniit atornerluisunngornissaminnut nalorninartorsiorsinnaasut, tassa peqqissutsiminut pitsaanngitsumik kinguneqarsinnaasumik. Atornerluineq inuuniarnermi atugarisatigit ajornartorsiuteqarnermut pissutaasinnaallunilu aamma tamatumunnga ilutigitillugu inuuniarnermit ajornartorsiuteqalernernik kinguneqarsinnaavoq.

“Siunissami nunatsinni atornerluinnermut katsorsaasarnermik pilersaarutissatut siunnersuut”, tassa UPA 2015-imi saqqummiunneqartumi imigassamik, hashimik aningaasanoorajunnermillu ataatsimoorussamik ilisimatusarnermillu tunngaveqartumik katsorsartarnissaat allaaserineqarpoq. Pilersaarummi pitsaaliuinermi atornerluisunillu

katsorsaanermi iliuuserineqartartut nassuiaatigineqarput aamma atorneerluineq pillugu inatsisissamik suliaqarnissaq siunniunneqarluni.

Nalunaarusiat siunissamilu atorneerluisunik katsorsaasarnissamut pilersaarutissatut siunnersuutip inatsisissatut siunnersuutip imarisaanut tunngavigineqarput. Inatsisissatut siunnersuummi oqaaseq pinngitsuuisinnaajunnaarneq atorneqarpoq oqaatsimut atorneerluinermut taarsiullugu.

Inatsisissatut siunnersuummi siunertarineqarpoq inuit pinngitsuuisinnaajunnaarsimanermik ajornartorsiuteqartut sapinngisamik siusinnerpaamik kinaassusersineqarnissaat, tassa inuup pinngitsuuisinnaajunnaarsimaneq pillugu katsorsarneqarnissaanik neqeroorfiginissaa aamma katsorsaanerup sunniutigisai atatiinnaarneaannassasut.

Pinngitsuuisinnaajunnaarnermik katsorsaaneq inatsisissatut siunnersuummi qitiutinneqarpoq. Inatsisissatut siunnersuummi katsorsaanerme neqeroorutit assigiinngitsut taagorneqarput piffissallu ingerlanerani pisariaqartitat allanngussappata katsorsaanerme allanik neqerooruteqarnissamut periarfissiisoqarluni.

Katsorsaanerup pilersinneqarneranut aqqissuussinermi qitiutinneqarpoq pinngitsuuisinnaajunnaarsimanermut qitiusumik ilisimasaqarfik, Allorfik. Allorfiup ilaatigut suliaasa ilagissavaat pinngitsuuisinnaajunnaarnermut tunngatillugu ataatsimoortumik iliuuserineqartut ataqatigiissartarnissaat kiisalu katsorsaanerme iliuuserineqartut ilisimasanut misilittakkanullu nutaanerpaanut aamma atorneerluinermik sammisaqarnermut tunngatillugu periutsinut pitsaanerpaanut qaqugukkulluunniit naleqquttuunissaat.

Taamatuttaaq inatsisissatut siunnersuut najukkani qitiusumik katsorsaaviit nassuiaassutigineqarput. Taakku ilaatigut suliaasaat ilagaat katsorsartinnissamut kaammattuinnissaq aamma inunnik pinngitsuuisinnaajunnaarsimasunik katsorsaasarneq. Kommunini tamani najukkami qitiusumik katsorsaavimmik pilersitsisoqassaaq.

Inatsisissatut siunnersuummi ilaavoq inuit aanngajaarniutitut tunngatillugu attaviit pillugit aalajangersakkat, inuit taakku tassaapput suliffeqarfimminni pinngitsuuisinnaajunnaarnermut tunngatillugu katsorsartinnissamik aamma katsorsartinnissamut kajumilersitsinissamut ilitersuisuusussat. Suliffeqarfiup nammineq aalajangissavaa aqqissuussinermik taamak ittumik pilersitsissanerluni, taamatuttaaq sulisup nammineq aalajangissavaa inuttut aanngajaarniutitut tunngatillugu attaveqaataarusunnerluni.

Inatsisissatut siunnersuut atorneerluineq pillugu ilisimasamik aqqissuussaasumik katersinissamut iluaqutaassaaq, taamaalilluni siunissami katsorsaariaatsit suut pitsaanerpaamik sunniuteqartarnersut ilisimaneqalerniassammata tamatumalu kingorna katsorsaanerme neqeroorutit naleqqussarneqarsinnaaniassammata. Inatsisissatut siunnersuut taamaalilluni pinngitsuuisinnaajunnaarsimaneq pillugu ilisimasamik katersuinissamut aalajangersakkanik imaqarpoq.

Suliaasaqarfiit akimorlugit suleqatigiinneq pitsaanerpaamik katsorsaanissamut katsorsaanerullu kinguneqarluanissaanik qulakkeerinissamut pingaarutilittut isigineqarpoq. Taamaattumik

inatsisissatut siunnersuut Allorfiup, kommunit peqqinnissaqarfiullu suleqatigiinnissaat pillugu aalajangersakkanik imaqarpoq.

Taamatut oqaaseqarlunga Naalackersuisut sinnerlugit siunnersuut Inatsisartunut suliassanngortippara.